

唐 石 經 考 正
諸 史 然 疑



卷之五



諸
史
然
疑

杭世駿
撰

中華書局

諸史然疑

余年二十有五始有志乎史學貧無全史且購且讀一日率盡一卷人事膠擾道塗奔走祁寒盛暑未嘗一日輟也風雨閉門深居無俚則又倍之閱五年而始畢功又一年而以通鑑參校史外又益以舊聞二千年之行事較然矣於諸史中以意穿穴有得則標舉其旨趣前人所論不復論前人所糾者亦不復糾也史漢攷證業有成書斷自後漢以迄六代唐宋以還論之不勝其論糾之亦不勝其糾也劉昫唐書趙上舍一清所贈窮日

夜觀之重複錯繆遠遜歐宋閒一論列咈咈不勝其繁
聞吳興沈東甫徵士有新舊合鈔一書余未及見恐有
雷同卽蹈勦說之咎藏諸篋衍未敢出以示人亭林顧
氏廣稽博攷日知錄中刊正漢書尚有數條與三劉闡
合者知其未見刊誤也以余弇陋望亭林之門仞遽難
窺測況敢哆口而掎摭前史之疵病乎勾甬全祖望同
里張燦貫串史事爲余畏友以是相質而不以爲非不
忍捐棄遂決意存之舊業就荒桑榆景迫時過而後學
獨學而無友二者交譏吾業止於是矣吾衰不能復進

矣悲夫仁和杭世駿大宗誌

後漢書

陳寔死天下會葬者三萬人郭泰死門人制錫衰者以千數樓望教授諸生著錄至九千人蔡元著錄者至萬六千人而其中無一傳道者以見東漢尚名隨聲附和非風俗之善

杜氏通典云明帝以李躬爲三老桓榮爲五更安帝以魯丕李充爲三老靈帝又以袁逢爲三老按楊賜傳光和元年其冬行辟雍禮引賜爲三老又伏恭傳建初二

年肅宗行饗禮以恭爲三老又周澤傳數爲三老五更此三條可補杜氏之闕

張儉傳延熹八年太守翟超請爲東部督郵時中常侍侯覽家在防東殘暴百姓所爲不軌儉舉劾覽及其母罪惡請誅之覽遏絕章表並不得通由是結仇覽傳云覽伺候遮截章竟不上儉遂破覽家宅籍沒資財具言罪狀又奏覽母生時交通賓客干亂郡國復不得御據此二傳則覽母已死儉特破家耳在苑康傳則云山陽張儉殺常侍侯覽母不亦慎乎又酷吏傳序云張儉剖

曹節之墓是又誤覽母爲節矣

杜篤傳遠救于已亡不若近而存存也章懷注引易成性存存是未知易者

河間獻王傳獻王脩學好古學舉六藝立毛氏學左氏春秋博士鄭氏詩譜云魯人大毛公爲詁訓傳獻王得而獻之以小毛公爲博士蓋獻王曾立之非太常所領也故藝文志云河間獻王好之未得立至平帝時劉歆建立左氏春秋及毛詩逸禮古文尚書皆列于學官斯時毛詩始得立焉建初中詔高才生受古文尚書毛詩

穀梁左氏春秋雖不立學官然皆擢高第爲講郎給事近署所以網羅遺逸博存衆家盧植謂毛詩左氏周禮各有傳記其與春秋共相表裏宜置博士爲立學官疑平帝時偶立毛詩博士後仍廢

通典州郡志疏河南鞏縣云故小平縣城在縣西北有津曰小平章懷于靈帝紀注但言小平津在鞏縣西北讀者幾不知小平爲縣也

東漢崇尚緯讖儒者多非聖無法動引孔子以實其說桓譚所謂矯稱孔某爲讖記以誤人主也如郅惲云漢

歷久長孔爲赤制蘇竟云孔某祕經爲漢赤制元包幽
室文隱事明班固云蘊孔佐之宏陳又曰孔歛先命聖
孚也其見于緯書者不可殫述逮後魏時又有名爲閉
房記者甄鸞注數術記遺謂孔子作三不能比兩臨孝
恭著孔子馬頭易卜書至有宅經亦託孔子作其離經
畔道也至矣

崔篆勸孔子建仕則知前之不欲仕莽者僞也荀爽以
女采許郭奔且令傅婢執奪其刃扶抱載之則知後之
欲圖董卓者亦僞也

李固傳夏門亭長小友趙誠夫一清以爲卽杜喬傳之楊匡

後漢書郎顗傳父宗學京氏易善風角星算六日七分
章懷注引易稽覽圖甲子卦氣起中孚六日八十分日
之七鄭元注云六以候也八十分爲一日之七者一卦
六日七分也覽者多不明其義易正義亦引稽覽圖云
卦氣起中孚故離坎震兌各主其一方其餘六十卦卦
有六爻爻別主一日凡主三百六十日餘有五日四分
日之一每日分爲八十分五日分爲四百分四分日之

一又爲二十分是四百二十分六十卦分之六七四十
二卦別各得七分是每卦得六日七分也李鼎祚易解
謂易軌一歲有四時十二月三百六十五日四分日之
一以坎震離兌四方正卦分直四時每一卦司一季一
爻司一氣每卦六爻六氣合之得四六二十四氣而以
十二辟卦直十二月每一卦各管四卦凡五卦直一月
一爻直一日合之得五六三十日朱震易傳解七日來
復云陽生于子陰生于午自午至子七日必復乾坤消
息之理也故以一日言之自午時至夜半復得子時以

一年言之自五月至十一月復得子月以一月言之自午日凡七日復得子日以一紀言之自午歲凡七歲復得子歲天道運行其數自爾合之爲一紀分之爲一歲一月一日莫不皆然故六十卦當三百六十日而兩卦相去皆以七日王伯厚云易卦之位震東離南兌西坎北爲一說十二辟卦分屬十二辰爲一說焦延壽爲卦氣直日之法合二說而一之旣以八卦之震離兌坎二十四爻直四時又以十二辟卦直十二月分四十八卦爲公侯卿大夫而六日七分之說生焉唐書歷志卦議

曰十二月卦出于孟氏章句其說易本於氣而後以人事明之京氏又以卦爻配朞之日坎離震兌其用事自分至之首皆得八十分日之七十三頤晉井大畜皆五日十四分餘皆六日七分止于占災眚與吉凶善敗之事至于觀陰陽之變則錯亂而不明宋王昭素王沿宋咸皆著論駁之劉牧鈞隱圖亦不之信惟李觀不取卦氣而取卦名以太元證之爲合

郎顗傳正月三日至乎九日三公卦也注凡卦法一爲元士二爲大夫三爲三公四爲諸侯五爲王位六爲宗

廟玉海云後魏正光歷有推四正卦術四正爲方伯中
孚爲三公復爲天子屯爲諸侯謙爲大人睽爲九卿升
還從三公周而復始

儒林傳杜撫作詩題約義通劉攽刊誤云案文題下當
有脫字蓋合云文約義通也此貢父妄解也詩題約義
通撫書名如此吳陸璣作草木蟲魚疏末附四詩源流
亦稱撫作詩題約義通蓋已在范曄前百餘年矣

蔡邕傳注洛陽記曰論語二碑二碑毀當是論語三碑
二碑毀乃合四十六枚之數刊誤云當是一碑毀若二

碑毀者當云皆毀而已勿深考矣

東夷傳遼東太守蔡諷等追擊勾驪於新昌戰歿功曹耿耗兵曹掾龍端兵馬掾公孫酺以身扞諷俱歿于陣此與主簿衛福功曹徐咸之擁蔽漁陽太守張顯小吏所輔之代平原令劉雄死前後一轍曷爲獨行傳遺之又西羌傳護羌校尉傅育死迷吾之難漢中太守鄭勤戰敗主簿段崇及門下史王宗原展以身捍刃與勤俱死又鮮卑傳其至鞬寇居庸雲中太守成嚴擊之兵敗散功曹楊穆以身扞嚴與俱戰歿皆可以參獨行傳之

闕

三國志

陳壽仕晉則當爲司馬氏諱宣王景王文王不敢稱名是也武帝親踐大阼於孫叔然則稱字以諱之在高貴鄉公紀乃書使使持節行中護軍中壘將軍司馬炎北迎常道鄉公璜嗣明帝後在陳留王紀咸熙元年八月庚寅乃書命中撫軍司馬炎副貳相國事以同魯公拜後之義九月戊午乃書以中撫軍司馬炎爲撫軍大將軍十月丙午乃書命撫軍大將軍新昌鄉侯炎爲晉世